

## ՄԱԿԴԻՐՆԵՐՆ ՈՒ ՀԱՍԵՄԱՏՈՒԹՅՈՒՆՆԵՐԸ ՎԱՐԴԳԵՍ ՊԵՏՐՈՍՅԱՆԻ ԱՐԶԱԿՈՒՄ

60-ականների հայ արծակն ունի ուրույն լեզվաոճ և աչքի է ընկնում գեղարվեստական ինքնատիպ մտածողությամբ: Գեղարվեստական արծակի լեզվաոճի մեջ դրսևորվում են առարկայական աշխարհի ընկալման և վերարտադրման տարաբնույթ երևույթներ: Գեղարվեստական խոսքն ընդհանրապես բեռնաթափվում է ավելորդություններից, ազատվում երկարաբանությունից և արհեստականությունից:

Ժամանակակից արծակը հագեցած է նաև իրականության գեղարվեստական արտացոլմամբ, բազմաթիվ գեղարվեստա-պատկերային միջոցներով:

Այս տեսակետից Վարդգես Պետրոսյանի ոճն առանձնահատուկ է. նա կարողանում է վերացական երևույթներին շոշափելիություն հաղորդել, առարկայացնել: Պատկերների առարկայական կոնկրետությունը նրա խոսքը դարձնում են շիտակ, պարզ ու արտահայտիչ: «Արտահայտչականությունը ոճի այն հատկությունն է, որ ազդում է ունկնդրի կամ ընթերցողի զգացմունքների ու տրամադրության վրա, թույլ չի տալիս նրան անտարբեր լինել խոսողի և խոսքի նկատմամբ»<sup>1</sup>: Խոսքն արտահայտիչ է դառնում լեզվական այնպիսի միջոցներով, ինչպիսիք են դարձվածքները, դիպուկ արտահայտությունները, կրկնությունները, մի խոսքով լեզվական այնպիսի միջոցները, որոնք արտահայտվում են պատկերավորմամբ: Գրողի գեղարվեստական մտածողությունը լավագույն ձևով արտահայտվում է պատկերային համակարգում: Պատկերավորությունը խոսքի ամենաբնորոշ կողմն է, միտքը շոշափելիորեն կենդանի ներկայացնելը: «Խոսքի պատկերավորման բնույթը սերտորեն կապվում է տվյալ գրողի գեղարվեստական մտածողության, նրա ոճի հետ և դառնում է ոճը հատկանշող հիմնական տարրերից մեկը»<sup>2</sup>:

Պետրոսյանի ոճի ինքնատիպությունը պայմանավորված է ամենից առաջ պատկերավոր մտածողությամբ: «Մտածողություն պատկերներով»<sup>3</sup>, - իսկական արվեստը այսպիսին է համարում Բելինսկին: Պետրոսյանը, ստեղծագործության բովանդակությունը ենթարկելով իր գաղափարական մտածո-

<sup>1</sup> Գ.Բ. Զահուկյան, Ֆ.Գ. Խլիպայան, Ընդհանուր գիտելիքներ, ոճաբանություն, Երևան, 1976, էջ 57:

<sup>2</sup> Աշոտ Մարության, Եղիշե Զարենցի լեզուն և ոճը, Երևան, 1979, էջ 152:

<sup>3</sup> Վ.Գ. Բելինսկի, Փիլիսոփայական ընտիր երկեր, Երևան, 1954, էջ 246:

ղութանը, արծակի լեզուն գերծ է պահում պատկերների ավելորդ կուտակումներից: Նրա արծակի պատկերավորման համակարգի հիմքը կազմում է հիմնականում համագործածական բառապաշարը: Համընդհանուր գործածական սովորական բառերը, դրվելով անսովոր կապակցությունների մեջ, թարմություն ու կենդանություն են հաղորդում պետրոսյանական խոսքի պատկերավորմանը: Պետրոսյանի խոսքը հարուստ է լեզվա-ոճական ու արտահայտչական հնարքներով, այսինքն՝ պատկերային համակարգի հարստությամբ: Դա ցույց տալու նպատակով հարկ ենք համարում քննել Պետրոսյանի արծակում իրենց թվական գերակշռությամբ աչքի ընկնող համեմատություններն ու այլաբանական-փոխաբերական բնույթ ունեցող մակդիրները, որոնք նպաստում են երկի ոճական ու գեղարվեստական արժանիքների հարստացմանը:

Մակդիրները, առանձնացնելով առարկայի համար կարևոր կողմերը, առարկայի այս կամ այն հատկանիշը դարձնում են ավելի պայծառ ու պարզ: Մակդիրները գեղարվեստական խոսքի միջոցներ են:

Երբ Վ. Պետրոսյանն ասում է *«քարքարոտ ջանգեզուր»*<sup>4</sup> (1, 239), նրա մեջ տեսնում ենք Հայաստանի քարքարոտ լեռները, այս որակունով առարկան դառնում է ավելի տեսանելի ու ընթերցողի մեջ առաջացնում է բազմազան տպավորություններ: Պետրոսյանը իր խոսքը գերծ է պահում ավելորդ, պատկերները ծանրացնող մակդիրներից: Գործածում է երևույթի էությունը բնութագրող մակդիրներ. «Մակդիրների, մանավանդ սովորական որոշիչների կուտակումը ծանրաբեռնում է խոսքը, ձգձգում ասելիքը, ստեղծում զուհագարդման ճիգ, բառը զրկում արտահայտչական իմաստային ու հուզական լիցքից»<sup>5</sup>:

Վարդգես Պետրոսյանի ստեղծած մակդիրներն աչքի են ընկնում ինչպես կիրառական-ոճական առանձնահատկություններով, այնպես էլ՝ խոր իմաստով ու բովանդակությամբ: Խուսափելով կրկնությունից՝ խոսքը արտահայտիչ ու պատկերավոր դարձնելու համար գործածում է նոր ու թարմ մակդիրներ: Օրինակ. «Բայց այսօր էլ, Լեռնասարում, *լերկ, ամայի լեռան* կատարին կա, ապրում է *տալօրիմակ, մենավոր մի ընկուզենի*, որ ամռան տոթ օրերին *կանաչ խարույկ* է թվում: Թվում է *չար* ու *անողորմ մի հրդեհ...*» (2, 603-604):

<sup>4</sup> Բնագրային օրինակները, որոնց մոտ աղբյուրը չի նշվում, բերված են Վարդգես Պետրոսյանի երկերի ժողովածուի 1-ին և 2-րդ հատորներից (1983թ.) և «Կրակե շապիկ» վեպից (1986թ.): Փակագծերում նշված թվերը ցույց են տալիս հատորը և էջը:  
<sup>5</sup> Հ. Զարթուրյան, Գրողի լեզվի և ոճի հարցեր, Երևան, 1979, էջ 241:

*Տարօրինակ. մենավոր, կամայ* մակդիրները օգնում են հեղինակին, որ իր վերաբերմունքն արտահայտի երևույթի նկատմամբ:

Առարկաների նկարագրությունը տպավորիչ դարձնելու համար հեղինակը սովորական մակդիրների կողքին վարպետորեն գործածում է նաև փոխաբերական իմաստ արտահայտող մակդիրներ: Վերը նշված օրինակում *խարույկ* բառի հետ գործածում է *կանաչ* մակդիրը, իհարկե, խարույկը չի կարող կանաչ գույն ունենալ, այստեղ հեղինակը համեմատելի եզրեր է գտել բնութագրվող առարկայի և մակդիրի միջև: *Կանաչ* մակդիրը գրողի կողմից ստեղծված մակդիր չէ, սակայն տվյալ գործածությունը նոր է ու թարմ:

«Երբեմն տրամադրությունները, զգացմունքները, ուժեղ գեղարվեստական պատկերները հնարավոր չի լինում բառի ուղղակի նշանակություններով արտահայտել, այլ հարկավոր է նման կամ մոտ բառերի երկրորդական նշանակությունները օգտագործել, որտեղ մի այլ բառ կամ արտահայտություն ծառայում է մի ուրիշ բառի պատկերավոր կամ հուզաարտահայտչական կողմը դրսևորելու»<sup>6</sup>: Օրինակ. «Ոչ, ես առամիս տակ չեմ ծամում *եժանագին փիլիսոփայության մոնպասը*, թե *անողոք ժամանակի առողջ ստամոքսն* ինչպես է մարսում ամեն ինչ, ես չեմ ուզում ձևակերպել *ճոճոռն դարձվածք* ...» (1, 328): «Ես քեզ որոնեցի այսօրվա Հայաստանի *թրթռուն, երիտասարդ մարմնի մեջ* ու *գունաթափ քարտեզներում*, որոնցով գրգռեցին մեր պապերի *ոյուրավառ հոգին*, որոնցով խաբեցին մեզ բոլորը» (1, 436): «...Պատմությունը ձևվել-հասակ էր առել նրա *մենության խեցու կարծր կեղևի* մեջ» (2, 439): Այսպիսով բառերը իրենց ուղղակի կամ առաջնային իմաստներից զրկվելով, ինչ-ինչ գույնգործություններում ձեռք են բերում նոր փոխաբերական նշանակություններ: Այսպիսի մակդիրները կոչվում են անհատական կամ հեղինակային: Պետրոսյանի ինքնատիպ ոճը օգնում է ստեղծելու անհատական բնույթի նորակերտ այնպիսի մակդիրներ, որոնք առարկաներն ու երևույթները ներկայացնում են ոչ իրենց սովորական տեսքով: Հեղինակային մակդիրներն ասելիքը դարձնում են շոշափելի ու զգացական:

Վ.Պետրոսյանը բնութագրվող առարկայի կամ երևույթի բնորոշ առանձնահատկություններից տարբեր գտնում է նոր, անհայտ հատկանիշներ, որոնք արտահայտում են գրողի վերաբերմունքը տվյալ երևույթի նկատմամբ: Այսպիսի մակդիրներ են *անպտուղ /քարեր/, ջուր դառած /քարեր/, կրակն /շապիկ/, կուլո /պատուհան/, փափուկ /դող/, զսպված /աղբյուրներ/, չապրած /մանկություն/, մրսած /ճյուղեր/, կծկված /կրպակ/, խուլ /լեռ/, խոժոռաղեն /ժայռեր/, մենավոր /ընկուզենի/, քառենամ /քարեր/, խենք /անձրև/:*

<sup>6</sup> Վարազ Առաքելյան, Գրիգոր Նարեկացու լեզուն և ոճը, էջ 217:

Այս կարգի մակդիրները հուզական բնույթի են, մատնանշում են առարկաների կամ երևույթների ներքին կողմը: Պետրոսյանը պատկերի արտահայտչականության համար չի գործածում արտակարգ բառակապակցություններ, այլ դրան հասնում է ենթագիտակցաբար: Դ. Ն. Շմելյովը գրում է. «Պատկերի գեղարվեստական արտահատչականությունը պայմանավորված է ոչ թե ինչ-որ անսովոր զուգորդություններով, այլ տվյալ աստիճանում դրանց պատճառաբանվածությամբ: Պատկերի կառուցման համար կարելի է օգտագործել նաև ավանդական ձևեր: Ի նորո հիմնավորվելով դրանք հենց իրենց անսպասելիության շնորհիվ ձեռք են բերում անհատական արտահայտչականության ուժ»<sup>7</sup>: Պետրոսյանի ոճի համար հատկանշական են նաև նկարագրական բնույթի մակդիրները, որոնք սեղմ ու պատկերավոր ձևով արտահայտում են առարկաների արտաքին, ֆիզիկական հատկանիշները: Օրինակ, հեղինակը, նկարագրելով Հայաստանի բնապատկերը, անհիշելի ժամանակներում չար կախարդի ձեռքով քարացրած Հայաստանը, գործածում է *քարացած Հայաստան* մակդիրը: «Ձաթնում է *քարացած Հայաստանը*» (1, 295): Սեկ այլ տեղ կարդում ենք. «...*Միլիոնավոր աղբյուրների ակունքների վրա կործած վիթխարի մի քարաստան Արագած, համաչափության բոլոր կանոններով սարքած հսկա քարաժխոր Ճաղկեվանք* և, ի վերջո *ամայության մեջ ժայթքած քարե զույգ շատրվան Արարատ*» (1, 293):

Նկարագրական բնույթի մակդիրների հանդիպում ենք Վ. Պետրոսյանի գրեթե բոլոր ստեղծագործություններում, որոնք խոսքին հաղորդում են պատկերավորություն, մեծացնում տպավորությունը: Ինչպես «Գյուղը սիրում էր այդ *անշուք*, ասես ամենքից *խոռվ շինությունը*» (1, 196) Զարանձավների *կույր աչքերն* են հիմա ինձ նայում...» (1, 395): «Հայրը նստած է ճաշասեղանի *խորթ ամայության* մեջ և խմում էր, խմում էր դառը, զարմանալի դառը հեղուկը» (2, 428): Նշված մակդիրները անհատական մակդիրներին զուգահեռ կոչվում են ընդհանուր, ժողովրդական լեզվամտածողության արդյունք են, որոնք անցյալում ժողովրդի կողմից ավանդաբար գործածվել են և մեր օրերում ևս կիրառվում են: Հաճախակի գործածման պատճառով նվազում է ընդհանուր մակդիրների արտահայտչականությունը, ուստի գեղարվեստական արժեքով նրանք զիջում են անհատական մակդիրներին: Բազմիցս գործածված, պարզ ու անպաճույճ, ավանդական ձևերը Վ. Պետրոսյանի գրչի տակ ստանում են նոր հնչելություն: «Մարդը, ելնելով իրեն չրջապատող զանազան երևույթների իր վրա թողած պարտավորություններից, այդ երևույթներին կամ առարկաներին հատկացնում

<sup>7</sup> Д. Н. Шмелев, Слово и образ, Москва, 1964, էջ 37:

եր առանձին որակումներ. վերջիններս կաշում էին առարկաներին և միշտ նրա անվան հետ էին հանդես գալիս»<sup>8</sup>:

Նկատի ունենալով հայ ժողովրդի տխուր անցյալը ժողովուրդը հայի աչքերին տվել է «*տխուր*» որակումը: «Խաժամուժի միջով վազում է մի տղա: *Տխուր աչքեր* ունի: Հայ է» (1, 609):

Պետրոսյանը գործածում է նաև գունային մակդիրներ, որոնք, դրվելով գոյականի վրա, դառնում են գրողի հույզերի ու տրամադրությունների արտահայտման հիմնական միջոցներից: Շատ դեպքերում մակդիրի և բնութագրվող առարկայի միջև կարող են չլինել նմանության եզրեր, օրինակ. «Ինչ-որ կոպիտ ոտք կարծես նորից, արդեն քանիերորդ անգամ փշրեց իր ջահելության *կապույտ ապակին*» (2, 496): «Պռան արանքից մի դեղին թել է կապված միջանցքի լույսը» (1, 175): «Գնաց, օրորվելով փողոցի *դեղին դատարկության* մեջ, իսկ Լևոնը վերադարձավ Լիլիթի հետ» (2 228): «*Ճերմակ արևը* նախ լցվում էր նարնջագույնով» (1, 510): «Ե՞րբ ծնվեց այդ *դարչնագույն հրեշը*» (2, 172): «Հեռավոր սարերի ծյունը արևի տակ թվում էր *սպիտակ հրդեհ*» (2, 173): Փոխաբերական իմաստով գործածված մակդիրները դառնում են երևույթների այլաբերական բնութագրիչներ:

4. Պետրոսյանը գունային մակդիրները կիրառում է նաև իրենց բուն՝ բառարանային իմաստով: «Քիչ չեն դեպքեր, երբ պատկեր է գոյանում առանց բառի փոխաբերական իմաստին դիմելու, բառի հենց ուղղակի իմաստի միջոցով»,-գրում է ռուս լեզվաբան ռճագետ Պ. Պուստովոյտը<sup>9</sup>: Օրինակ «*Սպիտակ վերքի* նման աղջկա մարմինը մնաց կանաչների մեջ, իսկ ջարդված կծերի ջուրը հողը խմեց մուգ կարմիր արյանը խառնած» (1, 305): «Բաբաթի վրա կախվել է *նարնջագույն արևը*» (1, 575): «Զուրը լցվել էր *մանուշակագույն մշուշով*» (2, 443): «Ցուրտ էր, պարզկա, և արտասուքը սառեց նրա թարթիչներին, *ծխագույն բեղերի* մազերի մեջ» (1, 521): «Բակում *դեղին, շլացուցիչ արև* է, կարծես նկարել է վան Գոգը» (1, 375): Ինչպես տեսնում ենք սովորական որոշիչը բարձրանում է մակդիրի աստիճանի դառնալով պատկերավորման միջոց: Ամեն անգամ ռճական մի գյուտ ընթերցողի մեջ առաջ է բերում նոր, թարմ զգացումներ: Առարկաների նկարագրությունը տպավորիչ դարձնելու համար Պետրոսյանը գործածում է նաև չափազանցական մակդիրներ, որոնք քերականական իրենց ճիշտ կազմության շնորհիվ՝ մակդիրի և որոշյալի մեջ ստեղծում են մտքի և ձևի ներդաշնակություն: Օրինակ. «Այդ ճյուղերի վրա, *հսկա տերևների*

<sup>8</sup> Վարազ Առաքելյան, Գրիգոր Նարեկացու լեզուն և ոճը, Երևան, 1975, էջ 200:

<sup>9</sup> П. Г. Пустовойт, Взаимоотношение слова и образа. В кн. П.: Поэтическая стилистика, Воронеж, 1982, т. 19:

հարևանությամբ, մենք մի-մի ընկույզ էինք թվում, որ նույնպես մերկ էինք և նույնիսկ անհայտ, քանի դեռ կյանքը չէր քարոզել մեր պատանեկության կեղևը» (1, 303): «...Հազար գույնի հազար չափսի քարեր» (1, 293): «*Ամենավիթխարահասակ ընկուզեմի*» (2, 437): Ինչպես տեսնում ենք մակդոյալի հատկանիշը դրսևորվում է չափազանցված բնութագրով: Այս մակդիրները և-ս դասվում են փոխաբերական մակդիրների շարքին:

Պատկերի արտահայտչականության համար Պետրոսյանի արծակում իրենց դերն ունեն մաս օքսիմորոն (ի-այերեն նրբաբանություն) մակդիրները: Օքսիմորոնները երկու տարբեր հակասական երևույթներ կապում են իրար հետ՝ ստեղծելով անսպասելիություն ու թարմություն: Օրինակ. «*Տխուր ժպտով*, մահ հպարտությամբ, ցույց է տալիս ցուցանակը» (1, 609): «*Հալից ընկել է, չար ուրախությամբ մտածեց, թեպետ յոթ-ութ տարով փոքր է իրենից*» (2, 441): «*Ղառը ըմժիծաղով* այս բառերը մտքումս կողք-կողքի են դնում» (1, 296): *Տխուր/ժպիտ, չար հուրախություն/ ղառը /ըմժիծաղ/ օքսիմորոն մակդիրների միջև կա ռճական ամբողջություն, նշանակությունների միահյուսում:*

Հաճախ գոյականը տարբեր կողմից բնութագրելու համար նույն գոյականի հետ գործածում է արտահայտչական երանգներ ունեցող, փոխադարձաբար միմյանց լրացնող ու պայմանավորող բազմակի մակդիրներ, որոնցից յուրաքանչյուրը ունի իրեն բնորոշ առանձնահատկությունը: Օրինակ. «*Ձույզերը կամաց-կամաց հալվում էին սթուրյան մեջ, քայլում էին իրար գրկած, շշմջալով տաք ու փափուկ բառեր*» (1, 65), «*Պարզ, անժպիտ աչքերով երեսունյոթ տարեկանը նայեց երիտասարդին*» (1, 75): «*Մարդիկ հանձնվել էին խենթ ու խենթ վայելքների հորձանքին*» (2, 438):

Երկու սովորական բառերով, որոնք առնված են որպես մակդիր, Պետրոսյանը հասնում է իմաստային խոր ընդհանրացման: Պատկերը դառնում է խոստում: 4. Պետրոսյանը, ռճական ընդհանրությունները հաշվի առնելով, հաճախ մի գոյականին բնորոշ մակդիրը դնում է տարբեր գոյականների վրա, որոնք յուրաքանչյուր հակադրության դեպքում արտահայտում են նոր նրբերանգներ. օրինակ «*Ես պատմեցի նրանց ինչ գիտեի այդ սովորական ու զարմանալի մարդու մասին*» (1, 95): «*Ես հիշեցի զարմանալի ու սովորական մի պատկեր*» (1, 101):

Հետաքրքրական է նկատել, որ Պետրոսյանը նույն գոյականը տարբեր ու բազմազան հատկանիշներով բնութագրելու համար տվյալ գոյականի վրա դնում է բոլորովին տարբեր մակդիրներ, օրինակ. *ծանր նկար /վերացական նկար, պայթուցիկ հասակ / բարդ հասակ /գեղեցիկ հասակ, համր լեռ /խուլ լեռ և այլն:*

Կոնկրետ, շոշափելի մակդիրներով են բնորոշում վերացական բառերն ու երևույթները. օրինակ «Անիվների միալար աղմուկն, այո, դուրեկան թմբիր էր բերում, խլացնում աշխարհի միալար աղմուկները» (Կ.շ. էջ 25): «Զորի լուռությունը, մի թել գետի գլխին կախված խոժոռադեմ ժայռերը, քրի մաքուր երաժշտությունը տրամադրում էին փափուկ, անկաշկանդ խոսակցություն» (Կ.շ. էջ 53), «անասելի դողդույուն, միամիտ ճիգ, հաշտ երեկո, թանձր հոգս, ծանր, անողորմ լուռություն, ծանր սխալ, սրտամաշ ցավ, տխուր ժպիտ, երագուն հայացք» և այլն: Մակդիրը կարող է դրվել նաև հատկանշային բառերի, ասենք բայերի վրա և արտահայտել հատկանիշի հատկանիշ, օրինակ՝ դառը ժպտալ, ցավագին ապրել, սրտադող սպասել, ծիծաղկոտ խոսել, դժվար գրել, լուռ ու աննկատ ապրել, զնգուն ծիծաղել, մեղմ ծիծաղել, մոռալ դիտարկել: Այս մակդիրները կոչվում են պարագայական:

Կան թվականով, մակբայով, դերբայով, անվանական ու բայական բառակապակցություններով (դերբայական դարձվածով) արտահայտված մակդիրներ: Նշենք մի քանի օրինակ. «Հագար մարդ կա, որ ապրում է առանց կույրադին կտրելու» (թվական, 1, 81), «Ես անցնում եմ արթնացող փողոցով» (դերբայ 1, 618):

Մակդիր-որոշիչների մեծ մասը դրսևորում է որոշյալի որակական հատկությունը «Աի բուք թմբիր էր իջել վրաս, կարծես անջատել էին ուլեղս, սիրտս, հիշողություններս» (1, 128), մյուսը արտաքին տեսքը «Որտեղ են կախելու այդ վիթխարի զանգը, երագի մեջ մտածեց ուսուցիչ Կամսարյանը աչքը հառած մենավոր զանգակատան ասեղնագործ գմբեթին» (1, 531), երրորդը՝ ներքին հատկությունը կամ էությունը /տարօրինակ էր ծառը քարի վրա, տարօրինակ էին արյան պես կարմիր նրա պտուղներն ու տերևները- Կ.շ. 52): Ըստ հայերենի շարադասության կանոնարկված կարգի մակդիրը, որպես որոշիչ ու պարագա (ծևի և չափի), նախորդում է լրացյալին:

Պետրոսյանի ստեղծագործություններում տրամաբանական շեշտի, մտային ու այլ գործոնների թելադրությամբ գործածվում են ինչպես նախադաս, այնպես էլ հետադաս կիրառությունները:

Բոլոր որոշիչներն ու պարագաները չեն, որ մակդիրի դեր են կատարում: Ոմանք էլ մակդիրը նույնացնում են որոշիչի հետ: Օրինակ՝ ռուս հայտնի բառարանագիր Ա.Ի. Օժեգովը մակդիրը դիտում է որպես որոշիչ, որը կցվում է առարկայի անվանը նրան տալով արտահայտչականություն<sup>10</sup>:

Մակդիրը պատկերավորման միջոց է ոճական կարգ, իսկ ոճաբանությունն օգտվում է քերականական իրողություններից:

<sup>10</sup> С. И. Ожегов, Словарь русского языка, Москва, 1953, էջ 843

«Մակդիրները՝ որպես պատկերավոր որոշիչներ, արտացոլում են առարկայի այն հատկանիշը, որոնք ընդգրկվում են հեղինակի կողմից և որոնց վրա հեղինակը ցանկանում է ընթերցողի ուշադրությունը դարձնել<sup>11</sup>»:

Վարպետորեն գործածելով բազմազան ու բազմատեսակ մակդիրները՝ Պետրոսյանը գեղարվեստական խոսքը կազմում է հակիրճ ու դիպուկ արտահայտություններով, որոնք չեն զիջում պատկերավորման ոչ մի միջոցի:

Որպես պատկերավորման-արտահայտչական միջոցներ Վ. Պետրոսյանի արձակում զգալի թիվ են կազմում նաև համեմատությունները:

«Համեմատությունները մի առարկայի կամ երևույթի նմանեցումն է մի ուրիշին՝ նրանց համար ընդհանուր հատկության հիման վրա»<sup>12</sup>:

Վ. Պետրոսյանի գեղարվեստական արձակում զգալի թիվ կազմող համեմատություններն առանձնանում են իրենց ինքնատիպ ու համոզիչ բնույթով: Նրա համեմատությունների ուժեղ ներգործությունը պայմանավորված է նրանով, որ ուշադրությունը կենտրոնացնում է համեմատվող այնպիսի երևույթների ու կապակցությունների վրա, որոնք իրենց գործածությամբ նոր են ու թարմ, մինչ այդ չէին նկատվել: Օրինակ. «*Հասակավոր գույզը նման էր փոթորկի բերանն ընկած տաշեղի կտորների*» (հ.2, 220): «*Ո՛հ տասնվեց հայացք, անտես մի թելի միանալով, ծգվեցին-ծգվեցին ու կաթի պես ընկան ցածրահասակ, անգույն զինվորի վրա*» (հ.1, 18): Բերված համեմատությունները նկարագրական բնույթի են: Համեմատության այս ձևը ամենատարածվածն է ու ամենաբնորոշը: Պետրոսյանը հիմնականում կիրառում է ոչ ծավալուն համեմատություններ, որոնց անդամները կապվում են *պես, նման, իբրև, ինչպես* և այլ համեմատիչ բառերով. «*Մայր արագիլը կանգնած է քանդակի նման ու նայում է՝ միայն ինքը գիտե՝ ուր*» (1, 303): «*Ես հիմա հրժվում եմ, երբ ինքնաթիռի բարձունքից նայում եմ Հայաստանին, տեսնում ճանապարհները, որ արյունատար անոթների պես մեր հողը դարձնում են տաք մարմին շնչող, անհանգիստ ու քրքռուն*» (1, 345):

Ճանապարհները արյունատար անոթներին նմանեցնելը պատկերային մի գյուտ է: Համեմատությունը բաղկացած է լինում երեք անդամից համեմատվող երկու առարկաներից և համեմատվող հատկանիշից, ինչի հիման վրա իրացվում է համեմատությունը: «*Ձեռքերը կոշտացած են, չեչոտ քարի նման, ուրեմն ամենանուրբ բանն աշխարհում չեչոտ քարն է*» (1, 371): Այստեղ առկա են համեմատության երեք անդամներն էլ. ձեռքերը

<sup>11</sup> Գ. Վահանյան, Հայոց լեզվի ոճաբանության ծեղմարկ, Երևան, 1956, էջ 87:

<sup>12</sup> Գ. Զահուկյան, Ֆ. Խլիլաթյան, Ընդհանուր գիտելիքներ ոճաբանության, Եր., 1976, էջ 60:

համեմատվում են չեչոտ քարի հետ, նրանց համեմատության հիմքը կոշտացած հատկանիշն է:

Պետրոսյանը հաճախ համեմատվող առարկան պատկերավոր ու տպավորիչ դարձնելու համար տվյալ երևույթին մոտենում է տարբեր կողմից. համեմատության մեջ է դնում տարբեր առարկաների հետ: «...Թող այդ *հայերեն բառերը մեխակների նման* իջնեն քո մենավոր շիրմին, սիրելի Ղուրյան, մեր անգերեզման մեռելներ, թող այդ *հայերեն բառերը բարեկամ բարերի պես* կոտրեն ձեր տների կոտրած ապակիները և ներս ընկնեն ձեր սեղանին, Ստամբուլում ապրող հայեր...» (1, 607):

Նույն երևույթը տարբեր առարկաների հետ համեմատելով՝ ստեղծում է թարմ ու ներդաշնակ պատկերներ:

Համեմատություն կազմելիս իրար հետ համադրում է նաև այնպիսի երևույթներ, որոնց մեջ թվում է, թե որևէ նմանություն չկա օրինակ. «Միայն ընկուզենին էր կանաչ, հազարաճյուղ, ավելի ընդգծված ու վեհատեսիլ, որովհետև շուրջը դատարկվել էր, և նա կանգնած էր մեն-մենակ, գորթից դավաճանաբար լքված սպարապետի պես» (2, 439):

Ընկուզենու և սպարապետի համեմատությունը հիմնված է համեմատության երկու անդամների ընդհանուր հատկանիշի *մենակ* ու *լքված լինելու* վրա: Պետրոսյանը հաճախ համեմատությունը կառուցում է այնպես, որ համեմատության հատկանիշը, որի հիման վրա համեմատվում է այդ երկու երևույթները, բոլորովին նոր անսպասելի է լինում ընթերցողի համար: Օրինակ. «*Սա չի վերաբերում, հիարկե, հիմնականին, հիմնականը մնացել է իմ մեջ որպես չարացած ականջ կանաչ ալոտում, որպես արկի բեկոր զինվորի մաշկի տակ*» (1, 347): Ելնելով ստեղծագործության գաղափարական հիմքից՝ Պետրոսյանը համեմատվող անդամների միջև գտել է նմանության եզրեր:

Կերպարի հոգեկան աշխարհը պատկերող երկար-բարակ նկարագրություններից խուսափելով՝ շատ սեղմ համեմատությամբ բացահայտում է հերոսի տրամադրությունը և հոգեկան աշխարհը. «*Գլխի փոխադրեն Լևոնը ուսերին գրամեքենա էր զգում, գրամեքենան տկտկում էր, անձրևի նման նյարդային ու անընդմեջ, ապակե կտորներին թափվող անձրևի նման*» (2, 229): «*Ծիածանագույնի մեջ դեռատի աղջկա մարմինը թրթռում էր իբրև բոց...*» (2, 575): «*Վերջին օրերին, այդպես են պատմում, խամրել, թառամել էին քույրերը ինչպես չջրվող ծաղիկ*» (2, 450): «*Վերհուշը կշռաքարի նման կախվեց ուղքերից, բայց նա կարողացավ դիմանալ*» (2, 238):

Այս համեմատությունները պատկերում են առարկայի, երևույթի ներքին էությունը: Համեմատվող առարկաների կամ երևույթների համեմատելի հատկանիշը վերցվում է ներքին, երբեմն փոխաբերական իմաստով ընկալվող